

# YPM bimbang anak asnaf

Sinar Harian - 28 Feb -

KUALA TERENGGANU – Anak-anak golongan asnaf perlu diberi bimbingan dan motivasi untuk meneruskan agenda pendidikan negara.

Ketua Pegawai Eksekutif Yayasan Pendidikan Majlis Agama Islam dan Adat Melayu Terengganu (YPM), Mohammad Imizan Ismail berkata, Program Pra Bimbangan Mingguan yang menyasarkan kanak-kanak berusia enam hingga 12 tahun itu wajar dilaksanakan pada masa akan datang.

"Melalui program ini, ia memberi impak besar kepada mereka dalam soal pendidikan supaya mereka merasakan diri tidak dipinggirkan masyarakat sekeliling dengan status kemiskinan yang dihadapi sekarang."

"Miskin bukan penghalang untuk berjaya dan YPM mengambil tanggungjawab ini untuk membudayakan nilai hidup berkonseptan Islam syumul yang menjadi teras kehidupan," katanya.

Menurut Imizan, selain mengutamakan pendidikan, kanak-kanak itu juga turut di-dedahkan dengan pengisian rohani, disiplin diri dan yakin pada kemampuan diri sendiri.

"Saya lihat 22 peserta program ini berjaya memajukan diri mereka walau dalam tempoh tiga hari bersama kerana semangat mereka sudah pulih dan berharap semangat itu terus kekal dalam diri masing-masing," jelasnya.

Diharap peluang memberi bimbingan kepada kanak-kanak daripada latar belakang asnaf itu dapat diteruskan kepada mereka yang belum menyertainya pada masa akan datang.

Turut menjayakan program berkenaan ialah Timbalan Dekan (Penyelidikan dan Siswazah) Unisza merangkap Ahli Lembaga Pengarah YPM, Prof Dr Abdul Hakim Abdullah dan Timbalan Dekan (Hal Ehwal Pelajar dan Alumni) Unisza, Dr Muhammad Zaid Ismail.



Kanak-kanak yang menyertai Program Pra Bimbangan Mingguan anjuran YPM kelihatan gembira bergambar bersama tetamu khas yang hadir pada program berkenaan.